

ARMENU 'NA VOTA

Sienti amicu,
sienti chi ti ricu.
Jàju 'na spina appizzata nô cori
e 'na stizza r'amaru nô feli
e gghiàju ru' pila nâ lingua,
propria nâ punta :
Vieni e m'aiuti
a putilli livari,
pi siri n' puocu ciù allècru,
e putissi parrari ciù ciaru,
e putissi cantari,
armenu 'na vòta
nâ vita,
e virri 'a gghènti se si vòta.

E appuoi, se puoi,
mi runi 'na manu,
a spustari sta petra,
ca supra ê pieri mi pisa,
'nca putissi iri luntanu,
e putissi, macari,
abbulari,
jàvutu,
armenu 'na vòta
nâ vita,
pi virri 'u munnu comu arrota.

Ma 'a sira,
prima ca scura,
vuogghiu turnari a casa,
macari mutu,
suliddu,
'rricugghiùtu.